

N cordin de acèl ne lea a cater amisc maraveousc

Enaudèda sun Bufaure la ferata "I magnifici 4", voluda da Stefano Zulian Cuz per recordèr Alex, Diego, Erwin e Luca



L'ombolt de Poza Dellagiacom, l capo del Socors Comelli e l president Dellai rec la targa che é stata benedida sun Bufaure. Sotite Stefano Zulian Cuz, che à volù e endrezà la ferata, con sia femena Lucia. (foto Robert Bernard)

L soreie no à volù mencèr en domenia a sciudèr i cheres de chi che se à binà sun Bufaure per recordèr amò n'outa i cater voluntadives del socors da mont de la Val de Sora, resté sot la levina de la Val Lasties ai 26 de dezember del 2009. De tropes i à responet a l'envit uzà fora da Stefano Zulian del refuge "Baita Cuz", per enaudèr la neva ferata, che Stefano à volù e endrezà col didament de Mauro Giovanazzi, Gianni Ghetta, Luigi Zulian e Maurizio Davarda, e che l'ha entitolà "I Magnifici 4" apontin per onorèr e recordèr i cater amisc che, metan al prum post la vita di etres, i à donà la sia.

La valor del socors

Alex, Diego, Luca e Erwin é stac recordé prum de dut te la messa, zelebrèda da don Alessandro, che dedant ai parenc di joegn morc e ai amisc del socors l'ha uzà fora l

segnificat el valor fon de la solidarietà e del dèr la vita per i etres. La capazität e la prontezza di voluntadives de jir coran olache l'è besegn, se l'ha veduda ence endèna la messa, canche n sgorle de vent mingol più fort che i etres l'ha fat levèr la tenda enjgnèda per varentèr dal soreie chel utèr a l'averta: te n senteamen cater voluntadives é corec a ciapèr ite i pèi sui ciantons, e dut é restà a so post. Dò messa l'è stat benedi na targa de bron a recordanza di cater joegn morc te Val Lasties e dapò paroles de recordanza e de ringraziament per ic e per duc i voluntadives e per chi che à volù e endrezà la ferata de Bufaure e sia inaudazion é states portèdes dant da l'ombolt de Poza Tullio Dellagiacom e dal president de l'Apt de Fascia Enzo Iori, che con comozion à volù recordèr i cater amisc, jontan ite n pensier per Dimitri Rizzi, ence el sgolà massa joen da noscia crepes ensin sul

paradis. Ence l president de la Provincia de Trent Lorenzo Dellai e l'assessor Tiziano Mellarini à tout pèrt a la zerimonia de inaudazion: Dellai à abù paroles de stima per i joegn voluntadives e de confort per sia families. L'ha uzà fora l valor del socors, che da chisc momenc grieves l ciapa amò maor forza per jir inant, e l'ha recordà che l'è apontin chisc i valores che fèsc pèrt da semper de noscia jent: la solidarietà, la sobrietà, l'identità, l jir adum. Noscia tera à dedant tempes senestres – à dit amò Dellai – e la comunanza de Fascia e chela de dut l Trentin les podarà passèr via chest troi adort demò se saron bogn de portèr inant chisc valores del volontariat, e de jir duc adum desche a fèr na ferata.

La ferata

En realtà demò na mendra pèrt de duc chi che é rué sun Bufaure i à podù fèr la ferata di 4 amisc, ajache

la é dassen senestra. "La ferata più impegnativa, ma ence più bela che aesse mai fat" – à dit zachei - "più senester che jir su la Stabler" – à jontà zachei etres. Dut l percors de la ferata, che é sparti te trei pèrts, é spiegà avisa te n codejel che é stat enjgnà per l'ocajon e olache se pel lejer ence mingol de storia de chel scito olache endèna la Gran Vera l'era n troi atrezà. Apontin da la volontà de recuperèr e revalutèr chisc percors storic l'è nasciù l'idea de la ferata. I lurieres é peé via jà l'an passà e chest invern, dò la tragedia de la Val Lasties, Stefano Zulian Cuz à pissà subito de ge dedichèr chest percors ai 4 amisc. "L prum tòch l'è n muie senester – spiega Stefano – e aon volù che l sie cuscita, per ge far entener subito a chi che volessa la far se ge sà l cajo de jir inant o se l'è mic che i dae de outa sobito, piuttosto che se troar en difficoltà n bon tòch en su." Toc verticai con pec ponc per poder

pojèr i piesc, se enterza a straver e traversèdes aerees, con na beleza ma ence n vet sotite da tor l fià, per ruèr con n troi panoramich ai ultimes 60 metres su dret, olache ge vel saer desfrutèr duta la forza restèda amò ti brac per se troèr sunsom, a n centené de metres dal refuge "Baita Cuz". La enrescida storica fata te l'Istitut Cultural Ladin à permetù de troèr fora veies retrac olache se veit ence i sudé de l'imper austroungarich sot ite i Maerins e adertura na veia sia te val de Sèn Nicolò sul troi che porta japede la ferata, olache vegnia enjgnà l legnam per duta la fortificazioni. Dassen na bela idea, chesta ferata, che fèsc mingol più riches nesc monc, la ne deida a recordèr mingol de noscia storia e l valor de noscia jent, e a no desmentìr cater de nesc fenc miores. Complimenc a Stefano Cuz e a duc chi che l'ha didà a portèr a compiment chest bel lurier. (Lucia Gross)

